

BERITA HARIAN

DATE: 16/6/2008

Abdullah ulangi pertahan jawatan

BH - 16/6/2008

PUTRAJAYA: Perdana Menteri Datuk Seri Abdullah Ahmad Badawi, semalam mengulangi akan mempertahankan jawatan Presiden Umno pada pemilihan parti yang dijadualkan Disember ini.

Beliau berkata, tiada alasan bagi beliau untuk tidak bertanding.

Ditanya mengenai tarikh peralihan kuasa kepemimpinan, Abdullah berkata, ini akan dibincangkan dengan timbalan beliau, Datuk Seri Najib Razak.

"Kami masih belum bersetuju secara tepat tarikh peralihan kuasa itu. Bukan dalam masa satu, dua atau tiga bulan akan datang," katanya pada sesi dialog dengan kira-kira 30 ketua media Forum Ekonomi Dunia, di sini.

Mengenai ekonomi Malaysia, Abdullah berkata, Keluaran Dalam Negara Kasar (KDNG) akan dapat mencapai pertumbuhan 5.5 peratus tahun ini, walaupun menghadapi cabaran ekonomi, terutama harga minyak yang melonjak.

Katanya, dengan harga minyak mentah yang tinggi, ada keperluan untuk menanggung projek mega dan memberi penekanan terhadap projek

pembangunan yang memberi tumpuan kepada rakyat serta projek pertanian dengan kesan segera.

"Beberapa projek tidak semestinya ditangguhkan, tetapi akan disesuaikan," katanya.

Kepada soalan mengenai reaksi kerajaan terhadap protes berhubung kenaikan harga bahan api bulan depan, beliau berkata:

"Biarkan mereka protes. Kita akan terus melakukan apa yang terbaik untuk rakyat bagi menangani kenaikan harga minyak mentah yang tinggi."

Mengenai langkah Arab Saudi untuk mengadakan mesyuarat pengguna dan pengeluar minyak utama di Jeddah bagi membincangkan harga minyak yang tinggi dan kesannya terhadap ekonomi dunia, beliau berkata, beliau berharap sesuatu yang positif akan dicapai, tetapi ia bergantung kepada pengeluar minyak utama itu sendiri.

Negara pengeluar minyak utama perlu menyedari kesan terhadap ekonomi dunia dan hasilnya rakyat miskin yang merana.

Bagi Malaysia, yang mengeluarkan 700,000 tong sehari, jumlah itu adalah

kecil berbanding Arab Saudi dengan pengeluaran sebanyak sembilan juta tong sehari.

Kepada soalan mengenai perubahan dalam sistem kehakiman, Badan Pencegah Rasuah (BPR), polis dan sistem penyampaian awam, beliau berkata, adalah penting untuk berkemampuan melaksanakannya.

Beliau berkata, adalah tidak mungkin melakukan semuanya pada masa sama dan ia akan mengambil masa.

Mengenai perlunya Akta Keselamatan Dalam Negeri (ISA) dikekalkan, beliau berkata, tahanan pencegahan adalah penting, tetapi pada

masa sama keadilan juga sama pentingnya.

"Mereka ditahan di bawah ISA berpeluang sehingga tiga bulan untuk kes mereka disemak semula melalui wakil perundangan," katanya.

Mengenai soalan kenapa lima pemimpin Hindraf ditahan mengikut ISA dan bukan dibicarakan di mahkamah, beliau berkata, ia bukan soal politik, tetapi langkah diambil bagi menghalang ancaman kepada keselamatan.

Abdullah berkata, teras Dasar Ekonomi Baru, yang menggantikan Dasar Pembangunan Nasional, akan meneruskan usaha membasmi kemiskinan tanpa mengira latar belakang kaum.

"Tetapi pembasmian kemiskinan mengambil masa lama," katanya.

Apa yang lebih penting, katanya, Malaysia akan berusaha untuk pertumbuhan yang tinggi bagi memastikan pengagihan peluang dan kekayaan sama rata untuk semua.

Abdullah yang juga Menteri Kewangan berkata, integrasi Asia Timur berjalan lancar dengan adanya Piagam Asean serta Sidang kemuncak Asia Timur. - Bernama

FAKTA NOMBOR

Pengeluaran minyak (tong)

700,000

Bagi Malaysia sehari

9 juta

Bagi Arab Saudi sehari